

# BH-Gas je u skladu sa Zaključkom Vlade FBiH izvršio uplatu sredstava na račun Energoinvesta

BH-Gas je u skladu sa Zaključkom Vlade FBiH izvršio uplatu sredstava na račun Energoinvesta i to za obaveze za gas u mjesecu martu, te za obaveze po osnovu PDV-a. Ovim je u **potpunosti** ispoštovan Zaključak Vlade FBiH i svako drugo tumačenje od Energoinvesta ili pojedinih portala je zlonamjerno i ne vodi ničemu.

Želimo da naglasimo da BH-Gas nije imao pravni osnov za direktno plaćanje obaveza prema Energoinvestu i to smo naglašavali svo ovo vrijeme tako da nikakvog odbijanja plaćanja nije bilo niti namjere da se građani i privreda dovedu u ovu situaciju. Sva dešavanja su prouzrokovana nedostavljanjem ruske fakture od strane Energoinvesta.

Uporište za plaćanje obaveze prema Energoinvestu je Zaključak Vlade FBiH kojim se nalaže uplata sredstava za gas i PDV prema Energoinvestu i BH-Gas je na bazi tog dokumenta izvršio zahtjev Vlade FBiH.

*Ono što još želimo naglasiti je to da je Zaključak Vlade jasan, a to što Energoinvest ne želi da zna i čime opet dezavuiše kompletnu javnost je to da su sve obaveze za mart mjesec po osnovu transporta kroz Mađarsku i Srbiju plaćene avansno u februaru mjesecu 2021. godine, a uvoznačka provizija koja nije dio Zaključka Vlade FBiH biće odmah plaćena nakon dostavljanja zbirne fakture od strane Energoinvesta.*

Istovremeno, Energoinvest nije ništa poduzeo po osnovu ugovora sa „starog“ pravca snabdijevanja, Beregovo-Zvornik, i te profakture i dalje ispostavljaju i FGSZ i Transportgas Srbija.

Ovi ugovori su i dalje važeći i BH-Gas ponovno podsjeća na obavezu Energoinvesta da te ugovore raskine uz saglasnost svih ugovornih strana, ali ne proizvodeći posljedice aktiviranja raskidne klauzule od 23 mil. USD.

Na kraju, ako BH-Gas nije platio sve obaveze po Zaključku kako se onda od jutros u 6 sati odvija redovno snabdijevanje FBiH prirodnim gasom.